

HOOFSTUK 10: ERKENNING EN TOEKENNING

1. INLEIDING

- 1.1 Die Voortrekkers ken aan lede getroue diens-, ABC-, spesialisasie- en graadwielkentekens toe vir Voortrekkerwerk wat afgehandel is.
- 1.2 Die hoofstuk omskryf die toekennings en ook die toekenning daarvan.

2. GETROUE DIENS-KENTEKENS VIR JEUG- EN VOLWASSE LEDE

2.1 Toekenning

- 2.1.1 'n Kommandobestuur ken getroue diens-kentekens toe aan lede wat formele voortrekkerdrag dra en wat gedurende enige jaar na die oordeel van die betrokke kommandobestuur getroue lede van *Die Voortrekkers* was. Diens op oord-, gebieds- en nasionale vlak moet ook in ag geneem word.
- 2.1.2 Wanneer 'n lid pligsgetroue, verantwoordelike en eerbare diens gedurende 'n bepaalde tydperk aan *Die Voortrekkers* gelewer het na die beste van sy vermoë, word dit as getroue diens gereken. 'n Kommandobestuur kan bepaalde kriteria daarstel en dit vooraf aan alle lede van die Voortrekkerkommando bekend maak onderhewig aan bepaling in artikel 2.1.3 van hierdie hoofstuk.
- 2.1.3 Heemraadslede kom ook jaarliks in aanmerking vir die erkenning van getroue diens deur die kommandobestuur. Die erkenning word gegee indien die persoon sestig persent van die kommandobestuursvergaderings bygewoon het, aktiewe betrokkenheid by kommando-projekte getoon het en 'n positiewe bydrae gelewer het tot die uitbouing van *Die Voortrekkers* se beeld in die gemeenskap.
- 2.2.4 Die betrokke kommandobestuur ken getroue diens-kentekens uit eie beweging en op eie koste toe.
- 2.2.5 Die hoofdagbestuur en 'n gebiedsdagbestuur kan ook getroue diens kentekens uit eie beweging toeken aan lede van hulle onderskeie dagbesture en aan lede wat hulle aanwys om bepaalde take te hanteer, met kennisname aan die betrokke kommandobestuur waarby sodanige lede geregistreer is.
- 2.2.6 'n Gebiedsbestuur ken die 25 jaar en daaropvolgende voorjukke toe aan lede wat daarvoor kwalifiseer binne die gebied. Sodanige toekenning geskied op aansoek deur en op koste van die betrokke kommandobestuur. Die aansoek geskied op die voorgeskrewe aansoekvorm. Die oorhandiging van hierdie voorjuk geskied op 'n wyse wat die geleentheid waardig is en gaan gepaard met die oorhandiging van betrokke sertifikaat.
- 2.2.7 Die hoofbestuur ken die 50 jaar en daaropvolgende voorjukke toe aan lede wat daarvoor kwalifiseer in *Die Voortrekkers*. Sodanige toekenning geskied op aansoek deur en op koste van die betrokke kommandobestuur. Die aansoek deur die kommandobestuur geskied op die voorgeskrewe aansoekvorm wat aan die betrokke gebiedskantoor gestuur word. Die oorhandiging van hierdie voorjuk geskied op 'n wyse wat die geleentheid waardig is en gaan gepaard met die oorhandiging van betrokke sertifikaat.

2.2 Beskrywing van getroue diens-kentekens

- 2.2.1 Vir elke jaar wat getroue diens gelewer is, word 'n kenteken aan lede toegeken soos omskryf in hoofstuk 26 van die reglemente.
- 2.2.2 Die kombinasie van 'n voorjuk en jukskeie dui die getal getroue diensjare aan wat 'n lid voltooi het.
- 2.2.4 Die jukskeie en voorjukke word vervaardig ooreenkomstig die ontwerp soos aangedui in die betrokke publikasie van die Voortrekkerdepot.

2.3 Dra van getroue diens-kentekens

Getroue diens-kentekens word gedra soos uiteengesit in hoofstuk 26 van die reglemente.

3. GRAADWIEL-KENTEKENS VIR JEUGLEDE

3.1 Toekenning

- 3.1.1 Die toekenning word aan die einde van die jaar deur 'n kommandobestuur gemaak nadat die kommandobestuur van oordeel is dat die betrokke jaar se graadwielwerk suksesvol

afgehandel is behalwe die Gr 7 graadwiel (dagbreek) wat voor die Voorslagkamp toegeken moet word.

3.1.2 Die kommandobestuur moet seker maak dat die spanoffisier genoegsaam opgelei is, oor die nodige aanbiedingsmateriaal beskik en ondersteun word om deur die loop van die jaar die graadwielwerk suksesvol aan te bied.

3.1.3 Die veldkornet of betrokke adjunkkommandoleier moet deur die loop van die jaar seker maak dat die span behoorlik vorder met graadwielwerk.

3.2 Assessering

3.2.1 Aan die einde van die jaar moet die kommandobestuur seker wees dat die jeuglede die vereiste graadwielwerk suksesvol afgehandel het alvorens die toekenning gemaak kan word.

3.2.2 Assesering geskied as volg:

- a) deur die loop van die jaar met spanbesoeke deur veldkornet/adjunkkommandoleier
- b) mondelingse, praktiese en/of skriftelike evaluering aan einde van die jaar.

3.2.3 'n Kommandobestuur kan bepaal dat 'n billike standaard nog nie bereik is nie en die betrokke jeuglede nog verdere inskerping moet ondergaan alvorens 'n graadwiel-kenteken oorhandig kan word.

3.3 Beskrywing van graadwiel-kenteken

3.3.1 Die betrokke kenteken word deur die Voortrekkerdepot ontwerp volgens voorskrifte.

3.3.2 Die Penkoppe en Drawwertjies se graadwiel is rond en word met oranje omboor.

3.3.3 Die Verkenners se graadwiel is rond en word met groen omboor.

3.4 Dra van graadwielkenteken

3.4.1 Die betrokke graadwielkenteken word op die erkenningsbaadjie gedra soos in hoofstuk 26 van die reglemente bepaal.

3.4.2 Die Penkop en Drawwertjie dra al die verworwe graadwiele solank hy/sy 'n Penkop of Drawwertjie bly en haal dit af as hy/sy 'n Verkenner word.

3.4.3 Die Verkenner dra al die verworwe graadwiele solank hy/sy 'n Verkenner bly en haal dit af as hy/sy 'n volwasse lid word.

4. SPESIALISASIE KENTEKENS VIR JEUGLEDE

4.1 Toekenning

4.1.1 Die toekenning word deur 'n kommandodagbestuur (veldkornetskapsbestuur), oorddagbestuur, gebiedsdagbestuur of hoofdagbestuur gemaak nadat die betrokke dagbestuur van oordeel is dat die vereistes van die betrokke spesialisasie suksesvol afgehandel is. Die hoofdagbestuur en gebiedsdagbestuur kan die aanbieders van 'n nasionale- of gebieds aktiwiteit bemagtig om 'n toekenning te maak indien die vereistes suksesvol afgehandel is.

4.1.2 Die betrokke dagbestuur moet altyd seker maak dat die aanbieder van die spesialisasie oor genoegsame kennis en vaardigheid beskik om die betrokke spesialisasie aan te bied en dat die nodige vereistes afgehandel is.

4.2 Assessering

4.2.1 Die betrokke dagbestuur moet 'n toetskomitee van een of meer volwassenes aanwys wat moet bepaal of die nodige vereistes, soos vir die betrokke spesialisasie omskryf, behoorlik afgehandel is alvorens 'n kenteken toegeken kan word. Die persoon kan nie die span-offisier van die span wees nie.

4.2.2 Die toetskomitee doen die volgende :

- a) deur die loop van die aanbieding 'n persoonlike besoek en/of
- b) aan die einde van die aanbieding 'n mondelingse, praktiese en/of skriftelike evaluering.

4.2.3 'n Toetskomitee kan aanbeveel dat 'n billike standaard nog nie bereik is nie en die jeuglede nog verdere inskerping moet ondergaan alvorens 'n kenteken oorhandig kan word.

4.3 **Beskrywing van spesialisasie-kentekens**

Die toepaslike kentekens word deur die Voortrekkerdepot ontwerp in oorleg met die betrokke nasionale komitees en deur die Voortrekkerdepot beskikbaar gestel.

4.4 **Dra van spesialisasie-kentekens**

Die betrokke spesialisasie kentekens word op die erkenningsbaadjie gedra soos in hoofstuk 26 van die reglemente bepaal.

4.5 **Verkenner spesialisasie vir Penkoppe en Drawwertjies**

4.5.1 Verkenner spesialisasies tot 'n maksimum van 2 kan deur 'n graad 7 jeuglid gedoen word na afhandeling van die betrokke gebied se Voorslagkamp.

4.5.2 Die toekennings kan eers verwerf word nadat die betrokke jeuglid geregistreer is as Verkenner in die daaropvolgende jaar.

5. **ABC TOEKENNING VIR JEUG- EN VOLWASSE LEDE**

5.1 **Toekenning**

5.1.1 Die kommandodagbestuur ken die betrokke jaar se toekenning toe aan die jeuglid of volwasse lid nadat die lid die nodige vereiste punte behaal het soos in die tabel hieronder uiteengesit.

5.1.2 'n Lid verwerf punte deur die betrokke aktiwiteite by te woon of aan te bied. Indien 'n lid slegs 'n gedeelte van 'n aktiwiteit bywoon sal hy of sy nie in aanmerking kom vir die punte soos uiteengesit nie.

5.1.3 Die onderstaande tabel geld vir alle lede.

TOEKENNING	MINIMUM VEREISTE PUNTE BENODIG VIR ELKE TOEKENNING	VLAKKE
Oranje	70	1
Groen	140	2
Blou	210	3
Silwer-Wit	280	4
Silwer-Oranje	350	5
Silwer-Groen	420	6
Silwer-Blou	490	7
Silwer-Rooi	560	8
Silwer-Silwer	630	9
Silwer-Goud	700	10
Goud-Wit	770	11
Goud-Oranje	840	12
Goud-Groen	910	13
Goud-Blou	980	14
Goud-Rooi	1050	15
Goud-Silwer	1120	16
Dubbel Goud	1190	17

5.1.4 Totale maksimum punte wat behaal is word jaarliks oorgedra.

5.2 **Punte vir jeuglede**

5.2.1 **Spanbyeenkomste**

1 punt vir werwing van 'n nuwe voortrekkerlid of ander individuele aktiwiteit wat die kommandobestuur identifiseer: Maksimum 5

1 Punt vir elke 10% bywoning: Maksimum 10 punte

5 Punte vir elke spankamp: Maksimum 10 punte

- 5.2.2 Kommando aktiwiteite
(Vyf aktiwiteite per jaar moet deur die kommando ge-identifiseer word en in die jaarprogram aangedui word wat gaan tel vir die erkenningstelsel bv. Waterkaskenades, Vorie Vasbyt, Speletjiesaand, Kerkparade ens.)
5 Punte vir elke ge-identifiseerde aktiwiteit: Maksimum 25 punte
10 Punte vir kommandokamp: Maksimum 10 punte
- 5.2.3 Oord – en gebiedsaktiwiteite
(Vyf aktiwiteite moet deur die kommando ge-identifiseer word en in die jaarprogram aangedui word wat gaan tel vir die erkenningstelsel bv. GGA, Voltvaart, Stadsnagmars, Kuieraand, ens.)
2 Punte vir elke ge-identifiseerde aktiwiteit: Maksimum 10 punte
15 Punte vir elke gebiedskamp bywoning: Maksimum 30 punte
- 5.2.4 Spesialisasies
(Slegs spesialisasies wat deur die betrokke kommandobestuur goedgekeur is kwalifiseer en sluit gebiedskampe hier spesifiek uit – dit word reeds bo ingereken)
2 Punte vir elke Spesialisasie wat gedoen word in span -, kommando - , gebiedsverband:
Maksimum 10 punte

Totale Maksimum Punte wat verdien kan word per jaar : 110 punte

5.3 Punte vir volwasse lede

- 5.3.1 Bywoning
Kommandobyeenkoms 5 punte: Maksimum 20 punte
Kommandokamp 10 punte: Maksimum 10 punte
Gebiedskampe 10 punte: Maksimum 20 punte
Informele kursusse 5 punte: Maksimum 10 punte
Formele kursusse 10 punte: Maksimum 20 punte
- 5.3.2 Aanbieding
Werwing van 'n nuwe voortrekkerlid 1 punt: Maksimum 5 punte
Spanbyeenkomste 1 punt: Maksimum 20 punte
Spankamp 5 punte: Maksimum 10 punte
Kommandobyeenkoms 10 punte: Maksimum 10 punte
Kommandokamp 15 punte: Maksimum 15 punte
Gebiedskamp kursusaanbieder 10 punte: Maksimum 10 punte
Gebiedskamp kursusleier 20 punte: Maksimum 20 punte
Gebiedskampleier 30 punte: Maksimum 30 punte
Gebiedskamp Adjutant, Sekretaresse, Finansies, Veldkornet 20 punte:
Maksimum 20 punte
Informele kursus 5 punte: Maksimum 10 punte
Formele kursus 10 punte: Maksimum 20 punte
Gebieds/Nasionale komitee 20 punte: Maksimum 20 punte

Totale Maksimum Punte wat verdien kan word per jaar : 300 punte

5.4 Ontwerp en dra van die toekenning

- 5.4.1 Die ontwerp van die betrokke toekenning word deur die Voortrekkerdepot gedoen.
- 5.4.2 Die kenteken word gedra ooreenkomstig die bepalings in hoofstuk 26 van die reglemente.
- 5.4.3 'n Metaalbalkie is ook beskikbaar wat 'n lid op skooldrag kan dra.
- 5.4.4 Slegs die hoogste toekenning word gedra.

5.5 Definisies

- 5.5.1 Met *werwing* word bedoel dat 'n nuwe lid gewerf word vir die beweging en die nuwe lid moet sy ledegeld betaal en vir ten minste een jaar 'n lid bly.

- 5.5.2 'n *Spankamp* is 'n kamp soos gereël deur die spanoffisier waar ten minste een nag uitgeslaap word en waarvoor 'n program vir ten minste 18 uur uitgewerk is.
- 5.5.3 'n *Kommandobyeenkoms* is 'n byeenkoms gereël deur die kommandodagbestuur anders as die normale bymekaarkom eenmaal per week. Dit vervang nie 'n spanbyeenkoms nie en vorm ook nie deel van 'n spanbyeenkoms nie.
- 5.5.4 'n *Kommandokamp* is 'n kamp gereël deur die kommandodagbestuur waartydens al die spanne van die kommando teenwoordig is en waar Voortrekkerwerk behandel word en ten minste twee nagte uitgeslaap word. Die kamp moet langer as 36 uur duur.
- 5.5.5 'n *Gebiedskamp* is 'n kamp soos gereël deur die betrokke gebied waar daar binne graadverband Voortrekkerwerk behandel word en ten minste 3 nagte vir die Penkoppe en Drawwertjies duur en ten minste 5 nagte vir die Verkenners duur. Die kamp moet 'n erkende gebiedskamp wees van die betrokke gebiedsdagbestuur.
- 5.5.6 'n *Spesialisasies* is die wat in die betrokke groep se Spesialisasies handleiding beskryf word. Al die vereistes moet noukeurig nagekom word. Dit sluit nie kentekens wat by kampe verdien word in nie.
- 5.5.7 Met *spanbywoning* word bedoel dat dit die bywoning van die jeuglede by hulle betrokke spanne soos weekliks gehou word, is. Indien die kandidaat 'n aanvaarbare verskoning voorlê moet dit in ag geneem word. Alle spanuittappies word hierby ingesluit.
- 5.5.8 'n *Addisionele kamp/toer* is 'n geleentheid soos gereël deur die span, kommando, oord of gebiedsdagbestuur wat ten minste 2 of 5 dae duur.
- 5.5.9 *Fondsinsamelings/Werksdae* vir volwasse lede is insamelings geleenthede of werksdae soos gereël deur die betrokke kommando-, oord- of gebiedsdagbestuur.
- 5.5.10 *Maksimum punte* is die meeste punte wat 'n lid in een jaar kan verwerf.
- 5.5.11 'n *Gebied Goedgekeurde Aktiwiteit (GGA)* is 'n aktiwiteit wat deur die betrokke gebiedsdagbestuur vir die doel goedgekeur is.